

摘藻堂四庫全書薈要

經部

欽定四庫全書會要

經部

欽定春秋傳說彙纂卷九

詳校官原任侍講_臣王燕緒

欽定四庫全書薈要卷一千八百

經部

欽定春秋傳說彙纂卷九

壬僖王十有五年齊桓七年晉緡二十六年衛惠二十六年

寅三年莊二十三年陳宣十四年杞共二年

齊桓三年秦武十九年楚文十一年

左傳春復會焉齊始伯也

穀梁復同會也

集說杜氏預曰陳國小每盟會皆在衛下齊桓始伯楚亦始強陳介於二大國而為三恪故齊桓自

欽定春秋傳說彙纂卷九

春秋傳說彙纂卷九

齊桓三年

秦武十九年

楚文十一年

齊桓七年

晉緡二十六年

衛惠二十六年

此年進之以在衛上遂終於春秋 楊氏士勛曰重
發傳者諸侯至此方信齊桓故更發之也 許氏翰
曰十三年十四年會至是又會三合諸侯而不盟以
示重慎是以盟則衆信莫敢渝也 呂氏祖謙曰莊
九年齊桓公自莒入齊十五年始伯鄉者說左傳須
分三節看五伯未興以前是一節五伯迭興之際是
一節五伯既衰之後是一節五伯桓公為盛則桓公
之有大功於天下固可知也然看得桓公之有大功
又須看得他有可憾者當王綱解紐國自為政彊者
凌弱衆者暴寡當時之人思大國之正已如褰裳之
詩此時得桓公出來總集天下之勢整頓天下之事
豈非有大功於當世然所謂猶有可憾者蓋五伯未
出先王之遺風餘澤天下之人猶有可見者伯主一
出則天下之人見伯者之功無復見先王之澤矣
張氏洽曰傳以為齊桓始伯蓋指諸侯始定而言然
魯未信服而自是之後宋人猶或主兵衛鄭未免復

叛蓋齊之伯業駸駸向定而諸侯之心猶未一也
汪氏克寬曰是後惟召陵侵楚陳序衛下蓋陳在喪

稱子故也

案齊先於宋左氏謂齊始伯也劉氏駁之以為齊
桓之伯當自十六年盟幽始不知鄆之會伯之始也
幽之盟伯之成也張氏治之說於情事為近

夏夫人姜氏如齊

穀梁

婦人既嫁不踰
竟踰竟非禮也

集說

孫氏復曰齊侯既死文姜不安於魯故如齊
孫氏覺曰姜氏但歸寧爾然經書之與齊襄之

事等者蓋婦人以夫家為歸一適其夫則終身不返
父母歿雖兄弟不往所以預為之嫌而防逆亂之將

萌也齊桓雖無齊襄之事蓋非禮之迹同也姜氏之惡不可勝誅矣然為齊桓者不得無罪蘇氏轍曰禮夫人父母在則歸寧歿則使大夫歸寧兄弟文姜之於齊桓兄弟也親行非禮也許氏翰曰鄆之再會魯尚未從桓公未能比近無以示遠務求合於魯是以受文姜以昭親親而齊魯之交卒合然而禮防一失夫人復啓越境之恣遂成如莒之姦張氏治曰文姜不如齊八年矣至此復如齊桓公欲求魯好以定伯業而不之拒也文姜播惡於襄公之世桓公絕之義也以欲求魯之故而不鑒覆車之轍豈未聞行一不義雖得天下不為之法乎春秋特書以累桓也張氏溥曰宗國魯為大王者之後宋為大齊不得宋魯伯必不成再會鄆齊宋合矣魯於齊北杏不至盟柯則平矣十四年伐宋會鄆僅使單伯公不親至十五年鄆之會魯無人焉桓知魯君臣尚未協也姜氏如齊而後同盟于幽齊魯之讎始於淫人其交

之合亦以淫人春秋無暇
責魯莊且以累齊桓矣

秋宋人齊人邾人伐郕郕公作兒

左傳

諸侯為宋伐郕

胡傳

伯者之先諸侯專征也非伯者而先諸侯主兵也

集說

杜氏預曰郕附庸屬宋而叛故齊桓為之伐郕范氏甯曰宋主兵故序齊上也班序上下以

國大小為次征伐則以主兵為先春秋之常也劉氏敞曰宋序齊上何主兵者也又曰諸侯之相伐則必推主兵者上之是以宋先序趙氏鵬飛曰郕叛宋而宋伐之連齊人者脅伯主之命也郕者邾之所自出懼其叛而入於邾也故同邾人伐之汪氏克寬曰石氏謂郕有二郕黎來乃小邾國三國伐郕乃

宋之附庸今考伐邾而後經不書邾惟書小邾城成周之役經書小邾人而宋仲幾曰邾吾後也昭二十一年傳稱邾申杜氏云小邾穆公子必有所據則邾為小邾明矣

案邾之役宋實主兵故齊序宋下伐鄭伐徐亦同胡傳謂二十七年盟幽然後成伯則三十一年梁邱之遇宋先於齊亦將疑齊未成伯耶

鄭人侵宋

左傳

鄭人間之而侵宋

胡傳

侵伐之義三傳不同左氏曰有鐘鼓曰伐無鐘鼓曰侵先儒或非其說以為聲罪致討曰伐無

名行師曰侵未有以易之者也然考五經皆稱侵伐在易謙之六五曰利用侵伐征不服也書之泰誓曰

我武維揚侵于之疆詩之皇矣曰依其在京侵自阮疆周官大司馬以九伐之法正邦國而曰賊賢害民則伐之負固不服則侵之而以爲無名行師可乎然則或曰侵或曰伐何也聲罪致討曰伐潛師掠境曰侵聲罪者鳴鐘擊鼓整衆而行兵法所謂正也潛師者銜枚卧鼓出人不意兵法所謂奇也

集說

鄭氏康成曰伐者兵入其境侵者加兵其境而已陳氏傅良曰據左氏說則齊侯侵蔡晉侯

侵楚皆用大師而總數國若無鐘鼓何以行師則左氏之例非矣公羊曰獮者曰侵精者曰伐以謂深者爲精淺者爲獮前後有侵師至破其國伐師不深者頗多則公羊之例又非矣穀梁云苞人民毆牛馬曰侵斬樹木壞宮室曰伐齊桓伐楚不戰而服無壞宮室伐樹木之事又豈二百四十二年行師悉皆如此暴亂乎則知穀梁亦非也張氏洽曰間諸侯伐鄉而侵宋不誠於服齊而背二鄆之會鄭之反覆於齊

楚之間蓋始於此黃氏震曰邠叛宋故齊為宋伐邠鄭以宋舊怨間之故反侵宋是背齊盟也故明年宋齊衛伐鄭鄭突處櫟者二十年一旦得志遽興修怨之師猶未知世有伯主也汪氏克寬曰侵伐二字必皆當時行師之名其義之是非繫乎事之得失不以是為褒貶也然有當書伐而書侵當書侵而書伐者春秋之變例也

冬十月

癸僖王十有六年齊桓八年晉緡二十七年武公稱三十四年衛惠二十二年蔡哀十七年

鄭厲二十三年曹莊二十四年陳宣十五年杞共三年宋桓四年秦武二十年楚文十二年

春王正月

夏宋人齊人衛人伐鄭

南北爭鄭於是始

左傳

諸侯伐鄭宋故也

集說

孔氏穎達曰往年齊桓始霸未敢即尸其任救患討罪今為宋伐鄭仍使宋自報怨故宋主兵

序於齊上也隱五年邾人鄭人伐宋附庸在伯爵之上是以主兵為先也孫氏復曰鄭背鄆之會侵宋故齊桓帥諸侯伐之齊序宋下與伐邾同張氏洽曰伐鄭不止為宋而已蓋鄭不服則諸侯之心未一也家氏鉉翁曰鄭突以庶篡嫡齊桓始霸當聲突舊惡請於王以正其罪宣示遠近以驚羣聽今為宋而伐鄭非名也汪氏克寬曰此伐鄭與二十六年伐徐皆以齊序宋下宋主兵也

秋荆伐鄭

左傳

鄭伯自櫟入緩告於楚秋楚伐鄭及櫟為不禮故也

集說

王氏葆曰齊方圖霸楚亦浸強北侵不已陳蔡鄭許適當其衝鄭之要害尤在所先故鄭者齊

楚必爭之地也

張氏洽曰自桓二年鄭已懼楚而

會鄧至此三十餘年而後受兵楚之威不輕用蓋如

此趙氏鵬飛曰楚十四年入蔡十六年伐鄭齊桓

公雖患之力未能制也

李氏廉曰鄭桓始寄帑於

號鄆得十邑而國之前華後渭左洛右濟主莖驪而

食溱洧實春秋要領之國而南北之樞紐也故楚禍

及鄭始此而終春秋為霸主之輕重焉又曰經書荆

伐鄭二始此年楚人伐鄭四始僖元年書楚子伐鄭

五始宣四年書大夫伐鄭四始成六

年楚會諸侯伐鄭二始襄二十四年

附錄左傳

鄭伯治與於雍糾之亂者九月殺公子闕別強鉏公父定叔出奔衛三年而復之曰

不可使共叔無後於鄭使以十月入曰良月也就盈數焉君子謂強鉏不能衛其足

冬十有二月會齊侯宋公陳侯衛侯鄭伯許男滑伯滕

子同盟于幽

公作公會許男下公穀有曹伯滑杜注滑國河南緱氏縣今河南開封府偃師縣

南二十里有緱氏故城古滑國也幽杜注宋地當在今河南歸德府考城縣境

左傳

冬同盟于幽鄭成也

公羊

同盟者何同欲也

穀梁

同者有同也同尊周也

胡傳

會者公也不書公諱也其諱公何也程氏曰齊桓始霸仗義以盟而魯首叛盟故諱不稱公惡

失信也其曰同盟何也程氏曰上無明王下無方伯列國交爭桓公始霸天下與之故書同盟志同欲也自古皆有死民無信不立故聖人以信易食答子貢之問君子以信易生重桓王之失春秋之諱公與是盟也豈不以信之重於生與食乎先儒或以為不書公者諱與讎盟誤矣果以桓為讎而諱與盟者曷不諱之也

於柯之盟

集說

何氏休曰同心欲盟也同心為善善必成同心為惡惡必成故重而言同盟也杜氏預曰書

會魯會之也言同盟服異也孔氏穎達曰嘗同盟

而異乃稱服異未嘗同盟則不為服異故盟不稱同

也僖二年齊侯宋公江人黃人盟于貫定四年公及

諸侯盟于臬鼫二盟並不稱同皆為未嘗同盟非服

異故不稱同也應稱同而不稱同者僖五年首止之

盟鄭伯逃歸七年盟于甯母鄭伯使子華聽命於會

而不稱同者鄭未服也八年盟于洮鄭伯乞盟而不稱同者鄭伯未列於會也文十五年夏晉卻缺帥師伐蔡戊申入蔡其冬諸侯盟于扈不稱同者蔡已先服也宣十二年同盟于清邱十七年同盟于斷道成九年同盟于蒲十五年同盟于戚十七年同盟于柯陵十八年同盟于虛打此六盟皆非服異稱同盟者清邱斷道與蒲於時諸侯已有二心同心討貳故稱同盟戚與虛打同心疾惡故稱同盟柯陵之盟鄭人不服欲令諸侯同心伐鄭故稱同盟猶襄十八年諸侯同心疾齊稱同盟圍齊也趙氏匡曰穀梁云不言公外內寮一疑之也案莊公與齊襄往來未嘗有阻豈於桓公更有疑哉此直夫子定貶責之旨何闕內外寮也陸氏淳曰淳聞於師曰會公會也不書公為公諱也桓之霸諸侯服之矣不從之則社稷危矣故不書公為公諱此與及齊高傒晉處父盟不書公義同陳氏岳曰凡空書會某侯是公自會也諸侯

皆序非微者明矣 蘇氏轍曰盟未有不同者也此
其曰同盟何也有不同者服也於是鄭始聽命 陳
氏傅良曰盟未有言同者於是言同盟以齊桓之初
主盟也夫主盟者舉天下而聽於一邦也王者不作
舉天下而聽於一邦古未之有也 薛氏季宣曰許
男何以先乎曹滑大也非禮班之序也桓公倡霸而
亂周班之序非長諸侯之道也 吳氏澂曰齊自北
杏以後屢合諸侯有會無盟者諸侯之心未一也至
此而鄭服始合九國之君而為此盟此桓公糾合諸
侯一匡天下之始 李氏廉曰胡氏有二例有諸侯
同欲而稱同者有惡其反覆而稱同者除于蒲毫城
北惡其反覆外其餘皆可入同欲之例矣穀梁有二
例曰同尊周也同外楚也除二幽為尊周外其餘皆
可入外楚之例矣但不可以同欲為皆美故二幽馬
陵于戚雞澤雖可褒而清邱斷道蟲牢亦書同新城
虛打于戲雖無貶而重邱平邱亦書同要之皆有通

處當參考為是劉氏以同盟為殷同之盟同盟之禮見於覲禮為壇祀方明方伯臨之桓非受命之伯假同盟之禮率諸侯以尊天子蓋自是始霸也亦是一說汪氏克寬曰同盟之義論者不同然皆不出於公羊之說杜預言服異蓋以左氏于幽之盟一則曰鄭成一則曰陳鄭服于新城曰從于楚者服于蟲牢于戲曰鄭服也于馬陵曰且莒服故也于雞澤曰晉為鄭服故合諸侯于重邱平邱曰齊成曰齊服也推是論之則清邱斷道之討貳于蒲以諸侯之貳皆所以服異于戚則鄭伯聽成而鄭已服柯陵亳北伐鄭而同盟則鄭服可知虛打則悼公初立而諸侯新服也是則因服異而言同盟也穀梁於二幽之盟皆曰同尊周于新城斷道雞澤平邱皆曰同外楚齊桓初霸直取同尊周而已晉伯十有四盟皆為外楚新城發傳著其始平邱發傳著其終斷道雞澤舉上下以包其餘也文定以諸侯同欲而書同又以惡其反覆

而書同二幽新城清邱斷道皆云同欲馬陵云同病
楚柯陵雞澤平邱云同懼楚皆同欲也以例推之于
戚同欲討曹虛打同欲救宋也于蒲罪其失信而尋
盟亳北惡其既同而又叛皆惡其反覆而書同者也
以例推之于戲亦既同而又叛也蟲牢惡其皆不臣
重邱惡其受賂而不討賊何休所謂同心為惡惡必
成者也穀梁云尊周外楚即所謂同心為善善必成
者也惡其反覆而書同謂其既同而復異也杜預言
服異謂其昔異而今同也愚故謂論者不同皆不出
於公羊同欲之說也若夫劉原父引殷見曰同謂設
方明如方岳之盟故書同然襄九年楚公子罷戎與
鄭人同盟于中分昭十九年邾人邾人徐人會宋公
同盟于蟲宣亦能設方明而用殷同之禮乎齊氏
履謙曰經書同盟者十有六幽幽新城清邱斷道蟲
牢馬陵蒲戚柯陵虛打雞澤戲亳城北重邱平邱其
載辭若曰同救災患同恤禍亂同獎王室同討不服

皆天下之辭所謂公言之也其不書同者若垂隴若
澶淵若祝柯若溴梁若皋鼬或以復讎或以平怨或
專自大夫或志在黷貨或宋楚主盟或兩國特相盟
或侯伯不與盟皆一國之辭所謂私言之也亦有天
下之辭公言之而不書同者首止甯母洮葵邱牡邱
踐土翟泉七盟是也七盟皆桓文之盛而春秋不書
同又有以見天下之一乎齊晉也故以十六盟視一
時之不同者則同盟為愈以七盟視他年之同盟者
則不同為盛蓋以其有不同者然後書同以別之既
曰無不同矣夫又何書同之有陳氏際泰曰桓蓋
經營數十年遲遲而後取之北杏之後已伐宋矣已
會鄆矣至伐鄭而猶序宋下也迨同盟于幽而後八
國諸侯始左提右挈推戴一人於節旄之下其時近
古而其氣象幾於王者至文不然一戰而勝一戰而
霸吁王風之降而為伯桓伯之降
而復為文君子悲世變為已亟矣

案同盟例三傳及胡傳各異汪氏克寬融會諸傳謂皆本於公羊同欲之義尤能得其要領

邾子克卒

穀梁 其曰子進之也

集說 何氏休曰小國未嘗卒而卒者為慕伯者有尊天子之心行進也 范氏甯曰附齊而尊周室

王命進其爵 劉氏敞曰此邾儀父也其謂之邾子

克何未成國曰邾儀父既成國曰邾子克未成國之

君卒不書葬不記也 孫氏復曰邾稱爵者始得王

命列為諸侯也 俞氏皋曰不日缺文也不書葬不

往會也 李氏廉曰王命之說三傳皆無明文然據

左氏此年冬王使虢公命曲沃伯以一軍為晉侯則

天子猶有

黜陟也

附錄左傳

王使虢公命曲沃伯以一軍為晉侯初
晉武公伐夷執夷詭諸為國請而免之既

而弗報故子國作亂謂晉人曰與我伐夷而取其地
遂以晉師伐夷殺夷詭諸周公忌父出奔虢惠王立
之而復

夷杜注
采地名

甲僖王
辰五年

十有七年

齊桓九年晉武三十九年衛惠二十
三年蔡哀十八年鄭厲二十四年曹

莊二十五年陳宣十六年杞共四年
宋桓五年秦德公元年楚文十三年

春齊人執鄭詹

詹公作
瞻下同

左傳

鄭不
朝也

胡傳

書齊人執詹惡齊之辭也鄭既侵宋又不朝齊詹為執政蓋用事之臣也其見執宜矣而以惡

齊何也以責人之心責己則盡道以愛己之心愛人則盡仁此春秋待齊之意也

集說

杜氏預曰詹為鄭執政大臣詣齊見執孔氏穎達曰僖七年傳曰鄭有叔詹堵叔師叔先言

詹是詹最貴也且傳稱鄭不朝也以君不朝而詹被執明詹是執政大臣為不道君使朝故執之也若詹

不至齊則無由被執知是詣齊見執蓋聘齊也趙

氏匡曰公穀皆云詹鄭之微者書甚佞也言微者不

當書特為佞書諸見執者豈無罪乎何獨特書此佞

孫氏復曰稱人以執惡桓也詹不氏未命也桓十

二月與鄭伯同盟于幽而春執鄭詹詹安用同盟不稱

行人者會未歸而見執也不言以歸者秋鄭詹自齊

逃來以歸可知也劉氏敞曰鄭詹者何鄭大夫也

執者曷為或稱行人或不稱行人稱行人者執之以

其所為使者也不稱行人者執之不以其所為使及
非行人者也又曰公羊云書甚佞也案春秋未有微
者而得書於經若詹為大夫而未命又何以別乎又
曰穀梁曰人者衆辭也以人執與之辭也非也宋人
執鄭祭仲邾人執鄆子亦可謂與之乎又曰鄭詹鄭
之卑者卑者不志此其志何也以其逃來志之也亦
非也紀履緌鄭宛之類亦同氏國豈卑者則不志乎
蘇氏轍曰詹不氏未賜族也許氏翰曰宋大鄭

小齊桓蓋德宋而威鄭文王之興大邦畏其力小邦
懷其德而桓反之是以為伯道也至於宋襄執鄆之
虐則桓不為矣張氏洽曰詹不氏與柔溺同桓執
鄭詹討鄭不朝之罪當書齊侯而稱人以非伯討貶
也諸侯不服不能修德以來之而執其大夫則小國
之從齊皆出於力不膽而非有心悅誠服之意為可
見矣李氏廉曰鄭詹說左氏是公穀皆以詹為佞
人此無據之言杜氏以稱人為賤之穀梁又以稱人

為與齊皆非公羊又以為魯信用詹計取齊淫女丹楹刻桷卒為後敗故甚其受佞其說出緯文謬妄不取

案鄭詹之執公穀據緯書以為佞人固不可用矣左氏以為不朝杜氏注謂詣齊見執夫同盟未逾月又使大臣如齊乃遽責其不朝無乃苛乎孫氏復謂盟未歸而見執以陳轅濤塗例之情事亦合故主左傳而孫氏亦附見焉

夏齊人殲于遂

殲子廉反公作殲

左傳

夏遂因氏領氏工婁氏須遂氏饗齊戍醉而殺之齊人殲焉

公羊

殲者何殲積也衆殺戍者也

穀梁

殲者盡也然則何為不言遂人盡齊人也無遂之辭也無遂則何為言遂其猶存遂也存遂奈

何曰齊人滅遂使人戍之遂之因氏飲戍者酒而殺之齊人殲焉

胡傳

殲盡也齊滅遂使人戍之遂之餘民飲戍者酒而殺之齊人殲焉春秋書此者見齊人滅遂恃

強陵弱非伐罪弔民之師遂人書滅乃亡國之善辭上下之同力也夫以亡國餘民能殲強齊之戍則申胥一身可以存楚楚雖三戶可以亡秦固有是理足為強而不義之戒而弱者亦可省身而自立矣

集說

何氏休曰稱人者衆辭也不書戍將帥者封內之兵故不書杜氏預曰齊人戍遂遂人討而

盡殺之故以自盡為文陸氏淳曰啖子曰殲者自殲之義也不言遂人殲之言齊人自取其殲也所以譏齊而不罪遂人也孫氏復曰齊人殲于遂自殲也鄭棄其師自棄也劉氏敞曰殲者何盡也此遂

人盡齊人也其曰齊人殲于遂何弗與也墟人之國
殺人之君私人之土制人之衆彊不義之至也力多
矣非有能盡齊者也齊自盡也又曰穀梁曰此謂狎
敵也非也滅人之國使兵戍之齊則無道矣令齊不
滅人國不戍人地安取此禍乎穀梁譏其狎敵似惡
齊人滅遂未盡戍遂未密不顧遂不可滅地不可戍
也蘇氏轍曰春秋之書敗亡其自取者三齊人殲
于遂梁亡王師敗績于茅戎以為其所以自處者固
敗亡之道而非敵之罪許氏翰曰齊師滅譚譚子
奔莒著其君不誑也齊人滅遂齊人殲于遂著其民
不歸也孟子謂伯者以力服人非心服也力不膽也
荀子謂桓公詐邾襲莒并國三十五則所滅蓋不盡
書書滅譚滅遂上下一見之也張氏洽曰絕滅社
稷以及其君慮其民之思舊主而以兵力強制之不
知彼心不服吾力稍怠必有出於意料之外者蓋王
者之道貴於興滅繼絕而齊之滅遂不止於殺一不

辜而已故聖人於此不言遂人殲齊戍而書其自殲所以伸遂人復讎之志而著桓公不仁以至於自殲其衆也家氏鉉翁曰遂之遺民鼓其餘勇猶足以殄滅齊戍春秋特為之書義之也吳氏澂曰齊桓伯事方興而以强大吞小弱滅遂而慮遂之遺民不服故遣齊之民戍守其地以無罪滅遂固已失遂人之心矣而齊之戍者或又陵蔑其舊民故遂人憤怒而盡殺之汪氏克寬曰穀梁謂無遂而存遂乃春秋存亡繼絕之意亦猶紀已滅而書紀叔姬卒葬紀叔姬存紀也陳已滅而書葬陳哀公書陳災存陳也案左穀作殲蓋盡殺之也公羊作殲何氏休以為積死非一徐氏彥謂相戮汙而死皆言其死之多也字雖異而義實相近

秋鄭詹自齊逃來

穀梁

逃義
曰逃

胡傳

逃者匹夫之事詹之見執若其有罪雖死可也
儻曰無罪苟見免焉請從惠於會使諸侯聞之

則不辱君命矣不能以理自明也而反效匹夫之行
遁逃苟免越在他國不亦賤乎特書曰逃以著其幸
免而不知命之罪也齊桓始伯同盟于幽而魯首叛
盟受其逋逃虧信義矣書自齊逃來又以罪魯也

集說

杜氏預曰詹不能仗節守死以解國患而遁逃
苟免書逃以賤之言與匹夫逃竄無異 陸氏

淳曰凡言逃者皆謂義當留而竊去也

劉氏敞曰

何以書逃責詹之辭也詹自以為有罪耶雖死之可

矣自以為無罪耶尚何逃之有詹恐其無罪見殺逃
而苟免則是不知命也 陳氏傅良曰外逃不書逃

來則書之書逃來譏與之接也苟不接雖莒僕來奔
宣公命與之邑季文子使司寇出諸竟則不書苟接

之矣介葛盧來僖公在會饋之芻米則書張氏洽
曰執列國大夫踰歷三時不令其服罪而去防閑弛
慢國囚亡逸齊之罪也竊身逃竄同於苟免之匹夫
無大夫之行失節辱國詹之罪也為逋逃主以取伐
於伯主魯之罪也李氏廉曰逃例三此年及僖五
年鄭伯逃歸不盟襄七年陳侯逃歸也君臣同辭皆
匹夫之事也然宣十七年高固逃歸不書襄十六年
高厚逃歸不書則春秋不以逃義罪二子也汪氏
克寬曰左傳僖七年稱鄭有叔詹為政則詹雖逃奔
魯蓋不久而歸鄭矣邵氏寶曰穀梁子曰逃義曰
逃詹之義何在死以立節生以待理張氏溥曰詹
逃於魯而魯納之桓自是治魯而不治鄭是詹實嫁
禍於魯也

冬多麋

公羊

何以書
記異也

胡傳

康魯所有也多則為異以其又害稼也故書此
亦禹放龍蛇周公遠犀象之意也害稼則及人

矣

集說

何氏休曰言多者以多為異也 范氏甯曰京
房易傳曰廢正作淫為火不明則國多廢 劉

氏厥

曰記異也何異爾為災也

孫氏覺曰以有為

災則書有有或是也以無為異則書無無冰是也康

者常有之物惟其多則書之 高氏閔曰聖人於災

之中各為之辨康書多者以多為災也蜚或書有者

以有為災不繫多少也康則常少以多為災不繫於

有也螟蟲之書不以其有不以其多但為災則書之

案經書多康或以為記災或以為記異劉氏敞兼用

之陸氏佃謂陰盛所感惡氣之應則當以記異為尤

正

乙惠王十有八年齊桓十年晉獻公詭諸元年衛惠二年

曹莊二十六年陳宣十七年杞共五年宋桓六年秦德二年楚文十四年

春王三月日有食之

集說

孫氏復曰不言朔不言日日朔俱失之也劉氏敞曰穀梁曰不言朔夜食也非也春秋闕疑

據見而錄何以知其夜食而書乎假令日始出其虧傷之處未復者是即朔日食矣如不見其虧傷云夜食可也見其虧傷是驗其食非朔日食何也又云王者朝日諸侯朝朔朔尋穀梁此意似云王者朝日故日之始出而有食者得見之也案禮記天子朝日於東門之外聽朔於南門之外南門之外者謂明堂位也

然則天子每朔先朝日而後聽朔諸侯每月先視朔而後朝廟乎穀梁之言以述朝日則是以解夜食則非

案合朔在夜則日食地中故有夜食之說然必謂朝日而知其食則未可據也蓋既見其虧傷之處則時刻可稽其為朔日無疑若或食於亥子之交則日未出而明復何從見其虧傷之處故專取劉氏敞說而不錄穀梁

附錄左傳

春虢公晉侯朝王王饗醴命之宥皆賜玉五穀馬三匹非禮也王命諸侯名位不同

禮亦異數不以禮假人虢公晉侯鄭伯使原莊公逆王后於陳陳媯歸於京師實惠后

夏公追戎于濟西

左傳

不言其來
諱之也

胡傳

此未有言侵伐者而書追戎是不覺其來已去而追之也為國無武備啓戎心而不知警危道

也春秋之意其必未雨而徹桑土閒暇而明政刑

集說

杜氏預曰戎來侵魯魯人不覺去乃追之
氏助曰追者寇已去而躡之也又曰去社稷遠

追戎危公

孫氏復曰案僖二十六年齊人侵我西

鄙公追齊師

至于鄆弗及先言侵而後言追此不言

侵伐者明不覺其來已去而追之也書者譏內無戎備
劉氏敞曰公羊以為大其未至而豫禦之也非

也若未至而禦何得謂之追乎此不待攻而自破者

又曰穀梁曰其不言戎之伐我何也以公之追之不

使戎邇於我也非也戎若不來公則無追今以戎來

故得追之先言戎伐後言追戎何害乎又曰于濟西

者大之也亦非也既不言戎之來又不言濟西則當但云公追戎矣未知追之於何所邪蘇氏轍曰不言戎之侵何也未及侵而追之而去兵未嘗交也高氏閔曰敵勝而去則不可追追者敵之敗者也敵緩而去則不必追追者敵之奔者也先王之法從緩不及逐奔不遠逐奔不遠則難誘從緩不及則難陷故敵知畏而遁斯止矣弗追也吳氏澂曰戎即隱桓與之盟者戎入魯境魯將禦之而戎遄退故魯莊以兵遠追之汪氏克寬曰春秋書追者二追戎濟西譏其在境而不能預備也追齊師至鄆譏其出境而弗敢及之也夫既不克預修戎備過於未來至於戎至境內又不克隨時應變命將出師以勝敵及其已退乃輕千乘之貴躡其後而逐之何足取哉張氏溥曰公追戎于濟西左氏諱之公穀並大之胡氏危之義各不同然無備啓戎立說足以為戒云

案左氏以為諱之蓋諱其無備也意與胡傳同
若公穀大之之說則非矣劉氏啟駁之甚明

秋有蠱

蠱又作
蠱音或

左傳

為災
也

公羊

何以書
記異也

穀梁

一有一亡曰有
蠱射人者也

胡傳

蠱魯所無也故以有書夫以含沙射人其為物
至微矣魯人察之以聞於朝魯史異之以書於

策何也山陰陸佃曰蠱陰物也麋亦陰物也是時莊
公上不能防閑其母下不能正其身陽淑消而陰慝
長矣此惡氣之應其說是也然則簫韶作而鳳凰來
儀春秋成而麟出於野何足怪乎春秋書物象之應

欲人主之
慎所感也

集說

何氏休曰言有者以有為異也

杜氏預曰

短狐也含沙射人本草謂之射工

范氏甯曰

京房易傳曰忠臣進善君不識厥咎國生蠱孔氏

穎達曰穀梁傳曰蠱射人者也洪範五行傳曰蠱如

蠱三足生於南越淫女惑亂之氣所生也陸璣毛詩

義疏云蠱短狐也一名射景如蠱三足在江淮水中

人在岸上景見水中投人景則殺之故曰射景或謂

含沙射人入皮膚其瘡如疥徐氏彥曰謂魯先無

蠱今乃有之案昭二十五年經書有鸛鵒來巢今此

不書來者亂氣所生不從外來故也楊氏士勛曰

舊解一有南越所生是也一亡魯國無是也今以為

一有一亡曰有者謂或有有時或有無時言不常也

故書曰有若螟螽之類是常有之物不言有也上十

七年云多麋者魯之常獸是歲偏多故書多也螟螽

不言多者螟螽是細微之物不可以數言之故不言多也又每年常有不得言有也所以異於蜚蠊與麋也張氏洽曰麋者迷也蠊者惑也是時文姜為亂於閨門之內其遺毒餘患至哀姜卒再成篡弑之禍物類之感天之示人顯矣李氏廉曰記異書有三年有蠊莊二十九年有蜚昭二十五年有鸛鵒來巢汪氏克寬曰春秋書螟螽蜚蠊生志蟲之害稼者也書多麋有蠊有蜚有鸛鵒來巢志物之為異者也蟲之害稼苟有蓄積以賑饑民則不為災物之異常苟能修德以消天變則不為異人為不善以致天變又不知警省而改過遷善以消悔怒則禍患之來弗能救矣或謂蠊字以古隸較之作蠊即蠊也食苗葉者竊疑春秋書螟螽皆不言有此書有蠊則為異而非蠊矣張氏溥曰鄭詹逃於魯魯信其計取齊淫女春秋說文有之不見他傳何休據以說經云多麋有蠊皆為魯惑詹也鑿矣

冬十月

附錄左傳

初楚武王克權使鬬縉尹之以叛圍而殺之遷權於那處使閻敖尹之及文王即位

與巴人伐申而驚其師巴人叛楚而伐那處取之遂門於楚閻敖游涌而逸楚子殺之其族為亂冬巴人因之以伐楚

權杜注國名南郡當陽縣東南有權城水經注沔水東會權口南流逕權城北古之權國也今屬湖廣安陸府那處杜注楚地南郡編縣東南有那口城今在安陸府荊門州東南

丙惠王十有九年

齊桓十一年晉獻二年衛惠二十五年蔡哀二十年鄭厲二十六年曹莊

二十七年陳宣十八年杞共六年宋桓七年秦宣公元年楚文十五年

春王正月

附錄左傳

春楚子禦之大敗於津還鬻拳弗納遂伐黃敗黃師于踏陵還及湫有疾夏六月庚

申卒鬻拳葬諸夕室亦自殺也而葬於經皇初鬻拳強諫楚子楚子弗從臨之以兵懼而從之鬻拳曰吾懼君以兵罪莫大焉遂自刎也楚人以為大閭謂之大伯使其後掌之君子曰鬻拳可謂愛君矣諫以自納於刑刑猶不忘納君於善

津杜注楚地江陵縣有津鄉今在湖廣荊州府枝江縣踏陵杜注黃地當在今河南汝寧府光州

西南境湫杜注南郡都縣東南有湫城今在湖廣襄陽府宜城縣夕室杜注地名

夏四月

秋公子結媵陳人之婦于鄆遂及齊侯宋公盟

公羊

媵者何諸侯娶一國則二國往媵之以姪娣從姪者何兄之子也娣者何弟也諸侯一聘九女

諸侯不再娶媵不書此何以書為其有遂事書

胡傳

媵淺事陳人微者公子往焉是以所重臨乎禮之輕者也齊侯伯主宋公王者之後盟國之大

事也大夫輒與焉是以所輕當乎禮之重者也禮者不失己亦不失人失己與人寇之招也是故結書公子而曰媵陳人之婦譏其重以失己也齊宋書爵而曰遂譏其輕以失人也遂者專事之辭聘禮大夫受命不受辭出境有可以安社稷利國家則專之可也謂本有此命得以便宜從事特不受專對之辭爾若違命行私雖有利國家安社稷之功使者當以矯制請罪有司當以擅命論刑何者終不可以一時之利

亂萬世之法是
春秋之旨也

集說

何氏休曰公子結出竟遭齊宋欲深謀伐魯故
專矯君命而與之盟杜氏預曰結在鄆聞齊

宋有會權事之宜去其本職遂與二君為盟故備書
之本非魯公意而又失媵陳之好故冬各來伐趙
氏匡曰大夫特盟公侯非禮也孫氏復曰媵書者
為遂事起也結矯命專盟故曰遂以惡之案僖三十
年公子遂如京師遂如晉襄二年仲孫蔑會晉荀瑩
齊崔杼宋華元衛孫林父曹人邾人滕人薛人小邾
人于戚遂城虎牢孔子皆譏之何獨與公子結也若
以書至鄆為出境乃得專之則公子遂自京師如晉
仲孫蔑會晉荀瑩自戚城虎牢豈非出境也哉況秋
與齊侯宋公盟而冬齊人宋人陳人加兵於魯非所
謂可以安社稷利國家也陳稱人者媵不當書故畧
言之也劉氏敞曰公羊以謂媵者諸侯娶一國則

二國往媵之陳人者陳侯也非也云公子結以妾媵
歸陳侯之婦則文理不成又無故貶損陳侯使從人
稱非正名之義蓋媵者送女也陳人者陳大夫也不
煩說矣又曰穀梁曰媵淺事也不志此其志何也辟
要盟也非也魯誠欲自託於大國者豈敢以媵婦之
名而遣使者以取戾於霸主哉使者銜媵婦之命而
遂要大國之盟是乃要盟矣何謂辟要盟乎杜氏
諤曰諸侯專相為盟猶曰不可況以大夫不奉君命
而專之乎故明書以示譏孫氏覺曰公子結於此
書之後遂不復見陸淳以謂有遂事之美故特書之
然公子結遂盟而召寇不可謂賢也或以為貶之故
不書卒然春秋之間惡有甚於公子結遂事而書卒
者矣程子曰鄆之臣室嫁女於陳人結以其庶女
媵之因與齊宋盟挈之以往結好大國所以安國息
民乃以私事之小取怒大國故深罪之書其為媵而
往盟為遂事呂氏本中曰使結既盟而齊宋不來

伐猶當以擅命之罪加之況無益而有害乎薛氏
季宣曰正卿送媵禮之過也遂盟非其事也張氏

洽曰是時莊公昏懦文姜制國政事不修君命不重
故結以私家之鄙事參會盟之大命先私後公而無
所畏興戎致討而莊公不誅國之無政莫大於此書
公子結媵陳人之婦于鄆如臧孫辰告糴于齊以為
臧孫之私行也諸家之說獨程子為得之李氏廉
曰魯大夫書遂始於此僖三十年公子遂遂如晉襄
公十二年季孫宿遂入鄆大夫之專國有漸然盟聘
而專猶可也兵事而專甚矣然胡氏釋遂字又有專
事兩事生事之殊要之皆不宜遂也公羊以為善穀
梁以為魯實使之皆非經旨汪氏克寬曰前漢馮
奉世矯發兵擊破莎車議封奉世蕭望之曰矯制發
兵雖有功效不可為後法陳湯矯制發兵與甘延壽
襲斬郅支單于軍還論功臣衡等以延壽湯擅興師
矯制幸得不誅不宜復加爵土先儒謂奉世延壽湯

矯制以成功望之衡以為不可封者春秋譏遂事之法也今考朱子綱目凡此類悉以矯制書之豈非取法春秋譏公子結之遺意乎然考之傳注說穀梁者以為公子結之媵與盟皆出君命左傳注疏則謂魯使公子結往媵而盟非魯公意臨江張氏臨川吳氏又以盟出君命而媵乃結之私事據文定傳則二事皆非君命竊考經文不書如陳送媵而書媵陳人之婦則非奉君命而媵陳之微者矣微事不見於經書者譏其因事與齊宋盟爾若齊宋之盟出於公命當如公孫茲如年因聘而娶經但書聘而不書娶此亦但書盟而不書媵矣

案公穀皆以為魯女媵陳侯之婦胡傳以為微者程子則謂鄆之臣室嫁女於陳人結以其庶女媵之據孔疏謂為人媵者皆送至嫁女之國使之從嫡而行今經書于鄆則程子之說信矣孔疏傳會公穀之說

謂鄆為衛地陳娶衛女結送媵向衛至鄆停女會盟
果爾則當書至鄆不書于鄆矣于鄆者媵于鄆也

夫人姜氏如莒

穀梁

婦人既嫁不踰
竟踰竟非正也

集說

杜氏預曰非父母國而往書姦
楊氏士勛曰重發傳者嫌此適異國恐別故發傳以同之

張氏洽曰為國君之母非父母國而出入縱恣此行
比於詩之所刺謂魯道有蕩齊子豈弟者抑又甚矣
莊公既無復防閑之意而執國政者無人抑又可知
安得不成淫風而致篡弑之禍與
家氏鉉翁曰前此姜氏如齊齊不能討遂使肆然罔忌蕩遊及莒非
惟魯之辱亦齊之辱也
吳氏澂曰夫人自齊襄弑
後八年不出因十五年又一至齊蓋假託國事以愚
其昏懦之子莊公不能制故於今如莒也父母沒不

得歸寧雖兄弟之國且不可往況往他國乎

附錄左傳

初王姚嬖於莊王生子頹子頹有寵爲國爲之師及惠王即位取爲國之圖以爲囿

邊伯之宮近於王宮王取之王奪子禽祝跪與詹父田而收膳夫之秩故爲國邊伯石速詹父子禽祝跪作亂因蘇氏秋五大夫奉子頹以伐王不克出奔溫蘇子奉子頹以奔衛衛師伐周冬立子頹

冬齊人宋人陳人伐我西鄙

此見伐之始

穀梁

其曰鄙遠之也其遠之何也不以難邇我國也

胡傳

奉詞曰伐其稱人將卑師少也結方與二國盟則其來伐我何也齊桓始霸責魯不恭所謂失

已與人以招寇也或以結能爲魯設免難之策爲齊宋畫講好之計身在竟外而權其國家爲春秋子之

故稱公

子非矣

集說

何氏休曰鄙者邊垂之辭孫氏覺曰公子結以遂事召寇故齊宋陳皆來伐我三國有辭故

曰伐也西鄙魯之西竟也外師至魯皆曰鄙言其邊遠也侵伐他國但言某而已不曰某鄙魯必曰鄙者蓋寇之來者不過至於邊鄙而已不能至國都也春秋之法於內言戰而不言敗言圍而不言入言侵言伐而不言其至於國都所以親之尊之而備責之也哀公八年十一年再言伐我而不言其鄙者春秋之終而聖人之微旨也穀梁言不使難邇我國此深於春秋者之說也程子曰齊桓始霸責魯不恭其事故來伐也許氏翰曰公之事齊後於諸侯又受鄭詹未討齊宋在鄆將以陳人伐我而結知之故權國重而與之盟示先下之以禮齊宋以公子之盟未足以結成也故卒來伐而取服焉黃氏震曰諸家多

謂齊宋怒結抗君而來若止怒結之抗不受其預盟足矣伐我者必其素謀耳家氏鉉翁曰是歲周有子頹之亂衛師燕師稱兵伐周立子頹天子播遷於外桓公不能討乃以三國伐魯是春秋所責也吳氏澂曰魯之臣送已女為媵而遂與伯主大國盟不恭也是以聲其罪而伐之陳亦以結媵其國人之婦而輕慢伯主故與齊宋同興問罪之師結不知禮而為私為公兩失歡好禮之不可不謹也如是李氏廉曰經書齊伐我十四始於此莒伐我三邾伐我三吳伐我一皆書鄙穀梁說是也惟哀公之編吳伐我齊國書伐我不書鄙者胡氏各有說又曰齊之伐魯雖由公子結之不恭然魯自受鄭詹而背盟幽之信已得罪於齊矣但公子結又重齊之忿爾

丁惠王二十年

齊桓十二年晉獻三年衛惠二十六年蔡穆侯盼元年鄭厲二十七年曹莊二

十八年陳宣十九年杞共七年宋桓
八年秦宣二年楚堵敖熊囂元年

春王二月夫人姜氏如莒

穀梁

婦人既嫁不踰
竟踰竟非正也

胡傳

十有五年夫人姜氏如齊至是再如莒而春秋
書者禮義天下之大防也其禁亂之所由生猶

坊止水之所自來也衛女嫁於諸侯父母終思歸寧
而不得故泉水賦許穆夫人閔衛之亡思歸唁其兄
而阻於義故載馳作聖人錄於國風以訓後世使知
男女之別自遠於禽獸也今夫人如齊以寧其父母
而父母已終以寧其兄弟又義不得宗國猶爾而況
如莒乎婦人從人者也夫死從子而莊公失子之道
不能防閑其母禁亂之所由生故初會于禚次享于
祝邱又次如齊師又次會于防于穀又次如齊又再

如莒此以舊坊為無所用而廢之者也是以至此極觀春秋所書之法則知防閑之道矣

集說

高氏閔曰春秋迹其淫亂不可勝書故於將薨復三見之要其由惡以終為萬世婦人之戒

張氏洽曰文姜比年如莒春秋詳書蓋與詩之變風相應當是時一反闕雖麟趾之化而國俗於是大亂夫一國之事繫一人之本此聖人所以詳書文姜之行歟 吳氏澂曰比年書夫人往他國以姦而魯莊若罔聞知昔年猶可諉曰年未長也今年既長矣而如此其不予也甚矣 汪氏克寬曰文姜以桓三年至自齊至是蓋年六十矣淫姣之行老而彌甚比歲如莒備書不削雖國惡不容諱也朱子綱目於武壘將殂之際屢書周以張易之為奉宸令周賜張昌宗爵鄴國公其亦春秋志姜氏如莒之遺旨歟 金氏賢曰案桓公十有八年書公與姜氏遂如齊蓋婦人既嫁不越境文姜父母已歿無歸寧之理桓公失制

義之道遂與之如齊以致夫人蹈鳥獸之行而公遭彭生之禍春秋書此以示為夫人者不可不以義制其妻也莊公元年書夫人孫于齊蓋文姜與弑義所不容雖為君母恩難掩義故去其姜氏絕不為親春秋書此以示為婦者一失其正則無所容其身也其後書夫人姜氏會齊侯于禚享于祝邱如齊師會于防會于穀如齊再如莒則夫人淫亂之行甚矣莊公防閑之道微矣春秋書此以示為人子者不可失閑家之道以縱母於惡也張氏溥曰莒非父母國而如者意夫人為齊桓所絕也夫人行年六十而不知恥莊公成君二十年而不能子是可哀也

附錄左傳

春鄭伯和王室不克執燕仲父夏鄭伯遂以王歸王處于櫟秋王及鄭伯入于鄆遂

入成周取其寶器而還冬王子頹享五大夫樂及徧舞鄭伯聞之見虢叔曰寡人聞之哀樂失時殃咎必

至今王子頽歌舞不倦樂禍也夫司寇行戮君為之不舉而況敢樂禍乎奸王之位禍孰大焉臨禍忘憂憂必及之盍納王乎

號公曰寡人之願也

集說王氏錫爵曰子頽以庶孽而奸王位殃咎固所必至者奚俟哀樂失時而知之抑微此將不納乎王

夏齊大災

公羊

何以書
記災也

穀梁

其志以
甚也

集說

范氏甯曰外災不志甚謂災及人也杜氏預曰來告以大故書天火曰災孔氏頽達曰襄

九年三十年宋災昭九年陳災十八年宋衛陳鄭災
皆不言大知此來告以大故書大也 楊氏士勛曰
國曰災邑曰火其外災志者皆發傳故十一年宋大
水傳曰王者之後也襄九年宋災嫌火與水異傳曰
故宋也宣十六年成周宣榭災傳曰以樂器所藏目
之也此書齊大災傳曰其志以甚也昭十八年宋衛
陳鄭災傳曰其志以同日也其九年陳火傳曰閔陳
而存之也是也 啖氏助曰公羊曰大災者何大瘠
也若以大災為大瘠新宮災亦是新宮瘠乎災天火
也大之者其災大也 劉氏敞曰其言大何大非一
也宗廟廡庫盡矣此齊火災也何以書弔焉爾弔人
者哀其禍而救其乏又曰公羊曰何以書及我也非
也春秋豈其詳外而畧內哉 孫氏覺曰春秋之時
皇極之道汨沒不叙而天下災異不可勝紀故春秋
但取其著者書之惟宋齊陳鄭三數大國而已蓋舉
近可以明遠記大可以知小也 張氏洽曰齊人來

告而魯往弔之故書程氏端學曰人事不理則責見於天春秋書之使後世懼天威也懼天威則謹人矣事

秋七月

冬齊人伐我

戎穀作我

集說

許氏翰曰齊桓既伯七年諸侯畧定是時始伐戎張氏洽曰戎在徐州之域最近齊魯故先

治之也

家氏鉉翁曰是時周有子頽之亂惠王出

居於鄭之櫟齊桓身為盟主坐視而不救去年伐魯

今年伐戎大率皆逐利而自私於王室何有汪氏

克寬曰穀梁傳作伐我蓋誤也經書外伐我十有九

皆書四鄙惟哀八年吳兵至城下十一年齊師伐我

戰于郊兩書伐我此言齊人則將卑師少安能深入

乎當從二傳作伐戎

卓氏爾康曰齊桓霸圖有漸

整頓家門先為營窟

宋譚遂卿戎最為相近譚遂

小國則滅之以廣土

宋魯大國則親之以連交戎未

可遽滅則伐以劫之

經營布置為根本計故是時殺

子頹納天王寧周室

寧讓鄭伯為之而置不一問齊

桓自謀立國固如此

張氏溥曰戎在魯西南魯之

患也齊伐戎為魯也

追戎濟西

者公之威為魯伐戎

者齊之德

案戎近齊而為魯患

齊桓伐之所以親魯也家氏鉉

翁謂周有子頹之亂

而坐視不救洵為正論若程氏

端學責其不告王而

專伐則諸

侯專伐者多矣何以

獨責桓乎

戊申

四年二十有一年

齊桓十三年晉獻四年衛惠二十

莊二十九年陳宣二十

年杞共八年

宋桓九年秦宣三年楚

堵敖二年

春王正月

夏五月辛酉鄭伯突卒

左傳

二十一年春胥命於弭夏同伐王城鄭伯將王自圉門入虢叔自北門入殺王子頹及五大夫

鄭伯享王於闕西辟樂備王與之武公之畧自虎牢以東原伯曰鄭伯效尤其亦將有咎五月鄭厲公卒

弭杜注鄭地當在今河南開封府禹州密縣境

虎牢杜注河南成皋縣也今河南開封府鄭州汜

水縣西有

虎牢城

胡傳

杜預稱莊公四年鄭伯遇于垂者乃子儀也而以爲厲公者案春秋突歸于鄭之後其出奔蔡

入于櫟皆以名書猶繫於爵雖篡而實君雖君而實篡不沒其實也忽雖世子其出奔猶不得稱子其復

歸猶不得稱伯以其實不能君也而況子儀雖乘間得立其為君微矣豈敢輕去國都與諸侯會於外乎故知遇于垂者乃厲公也其始終書爵不沒其實也亦可以為居正而不能保者之戒矣

集說

高氏閔曰高渠彌弑昭公立子亶齊人殺亶祭仲立子儀春秋皆沒而不書以突為鄭伯故也

張氏洽曰突莊公之孽子莊公既歿奪忽之位中間雖為祭仲所逐旋入于櫟卒取鄭國故不復著忽亶儀之在位以其不能君也論者以為突始終能君夫篡弑竊國之人而春秋終始君之且復記其卒於位所以著小人肆志亂賊得終王法不行而世之所由亂也家氏鉉翁曰自鄭突之入于櫟春秋蓋絕之矣及周惠王以子頹之亂出居于櫟諸侯勤王者獨鄭與虢爾厲公雖有篡國之罪亦有勤王之功是以春秋於其卒與葬而復錄之

秋七月戊戌夫人姜氏薨

穀梁

婦人弗目也

集說

范氏甯曰鄭嗣曰弗目謂不目言其地也婦人無外事居有常所故薨不書地僖元年傳曰夫

人薨不地此言弗目蓋互辭爾江熙曰文姜有弑公之逆而弗目其地弗目謂不題目文姜薨所也一日弗目其罪杜氏預曰薨寢祔姑赴於諸侯故具小君禮書之張氏洽曰文姜之行惡矣而卒以國君之母寵榮終身一用小君之禮此魯之禍所以未艾必至於莊公之終兩君弑哀姜慶父誅而後魯亂始息也

案穀梁弗目之說鄭嗣與江熙各不同而其實一也蓋夫人薨例不書地今文姜不書地亦與常例無異

則不目其地即
不目其罪也

附錄左傳

王巡號守號公為王宮於珪王與之酒泉
鄭伯之享王也王以后之肇鑑予之號公

請器王予之爵鄭伯由是
始惡於王冬王歸自號

珪杜注號地在今河南河南府澠池縣界
杜注周邑今陝西西安府同州有甘泉出匱谷中

造酒尤美
名酒泉

冬十有二月葬鄭厲公

集說

杜氏預曰八月乃葬緩
王氏葆曰據左氏鄭
伯有納惠王之功勲在王室然不免諡為厲者

其始以賂而篡立中以虐而出奔周室雖哀公議尚在臣子私諡不敢妄加美名古意猶可考也
王氏

元杰曰鄭忽雖嫡弱而無能鄭突雖庶強而有援諸侯與邪害正黨惡崇姦執祭仲以要盟納突而有國時在春秋公議猶在名之曰厲雖孝子慈孫百世不能改也張氏溥曰突既能君有功王室猶諡曰厲鄭人不能諱其篡奔之實也夫人姜氏行惡賊殺桓公薨葬備禮又諡曰文莊公念母而過魯人不能正也是有愧於鄭人矣

已惠王二十有二年齊桓十四年晉獻五年衛惠二十五年蔡穆三年鄭文公捷元年曹

莊三十年陳宣二十一年杞惠公元年宋桓十年秦宣四年楚堵敖三年

春王正月肆大眚

眚所景反
公作省

胡傳

肆眚者蕩滌瑕垢之稱也舜典曰眚災肆赦易於解卦曰君子以赦過宥罪呂刑曰五刑之疑

有赦五罰之疑有赦周官司刺掌赦宥之法壹宥曰
不識再宥曰過失三宥曰遺忘壹赦曰幼弱再赦曰
老耄三赦曰蠢愚未聞肆大眚也大眚皆肆則廢天
討虧國典縱有罪虐無辜惡人幸以免矣後世有姑
息為政數行恩宥惠姦宄賊良民而其弊益滋盖流
於此故諸葛孔明曰治世以大德不以小惠其為政
於蜀軍旅數興而赦不妄下蜀人久而歌思猶周人
之思召公也斯得春秋之旨矣肆眚而曰大眚譏失
也刑

集說

孔氏穎達曰肆大眚者肆緩也眚過也緩縱大
過是赦有罪也大罪猶赦則小罪亦赦之猶今

赦書大辟罪以下悉皆原免也趙氏匡曰穀梁云
為嫌天子不許之葬案當時天子微弱魯肯畏之乎
若實有畏王之心則自赦以除母罪豈為得禮且魯
莊未嘗有怨齊之心葬母肯有所忌赦自赦葬自葬

爾孫氏復曰肆大眚非正也亂法易常者也劉氏敞曰肆者何赦也眚者何罪也肆大眚何以書譏何譏爾肆大眚非禮也又曰公羊以謂譏始忌省也非也經云肆大眚而傳謂之忌者其文與其理不可訓解蓋不足難也穀梁曰為嫌天子之葬也非也文姜之存猶莫之討也今死矣反待天子而葬乎此皆不然者程子曰大眚而赦之其失可知凡赦何嘗及得善人諸葛亮在蜀十年不赦審此爾胡氏寧曰罪在五刑上天所討大眚皆肆春秋譏之張氏洽曰宥過無大刑過無小此堯舜三代之法不可偏廢者後世兩失之偏慘刻者不復察其情舉過失而盡刑誅之及姑息之過如莊公者反取大罪極惡而例之於眚災以從肆赦之例怙終得志良善瘖啞謂之肆大眚以譏其務小惠而失大德也吳氏澂曰眚固可赦而不言大聖人雖至仁然赦人之罪亦必有所劑量於其間不一槩也書肆大眚則罪之大而

不當赦者亦赦之譏其惠姦佚罰也 俞氏皋曰肆
眚常也非常為大肆大眚者罪惡無不赦之辭也異
於常故書

癸丑葬我小君文姜

公羊

文姜者何莊
公之母也

穀梁

小君非君也其曰君何也以
其為公配可以言小君也

胡傳

文姜之行甚矣而用小君之禮其無譏乎以書
夫人孫于齊不稱姜氏及書哀姜薨于夷齊人

以歸攷之則譏小君典禮當謹之於始而後可正也
文姜已歸為國君母臣子致送終之禮雖欲貶之不

可得
矣

集說

何氏休曰言小君者比與君為小俱臣子辭也
文者諡也夫人以姓配諡欲使終不忘本也

陸氏淳曰淳聞於師曰父子之道天性也母有罪子
不可得而貶也葬生者之事也臣子之禮其可虧乎

劉氏絢

曰夫人之諡皆私諡也婦人不尸善名不

當別諡

高氏閌曰婦人無爵何諡之有先王之制

但取夫之諡冠於姓之上以明所屬詩所謂莊姜宣
姜共姜經所謂宋共姬是也豈有不繫其夫而別自
為諡者哉夫人姜氏弑逆淫亂之人得罪於宗廟國
人之所不容今也云亡雖以子母之故不忍棄絕則
葬之足矣又別為之諡曰文而不復繫於桓公自是
魯國從而效尤凡夫人之死皆為之別立諡後世因
循不改大失春秋之旨矣
吳氏澂曰夫人之尊與
君同故薨葬一如君禮
程氏端學曰姜氏弑逆淫
亂得罪宗廟國人所當誅也而得成禮而葬魯之典
禮廢矣其不從夫諡與七月而葬乃其細事不暇論

也 王氏樵曰案周人以諱事神名終將諱之故易之以諡末世滋濫諡不應實爰及婦人婦人法無諡也生以夫國冠之韓姑秦姬是也死以夫諡冠之莊姜定姒是也末世別為作諡如景王未崩妻稱穆后非禮也

陳人殺其公子御寇

御音禦公穀作禦此書專殺之始

左傳

春陳人殺其大子御寇陳公子完與顓孫奔齊顓孫自齊來奔齊侯使敬仲為卿辭曰羈旅之

臣幸若獲宥及於寬政赦其不閑於教訓而免於罪戾弛於負擔君之惠也所獲多矣敢辱高位以速官謗請以死告詩云翹翹車乘招我以弓豈不欲往畏我友朋使為工正飲桓公酒樂公曰以火繼之辭曰臣卜其晝未卜其夜不敢君子曰酒以成禮不繼以淫義也以君成禮弗納於淫仁也初懿氏卜妻敬仲

其妻占之曰吉是謂鳳凰于飛和鳴鏘鏘有媯之後將育于姜五世其昌並於正卿八世之後莫之與京陳厲公蔡出也故蔡人殺五父而立之生敬仲其少也周史有以周易見陳侯者陳侯使筮之遇觀之否曰是謂觀國之光利用賓于王此其代陳有國乎不在此其在異國非此其身在其子孫光遠而自他有耀者也坤土也巽風也乾天也風為天於土上山也有山之材而照之以天光於是乎居土上故曰觀國之光利用賓于王庭實旅百奉之以玉帛天地之美具焉故曰利用賓于王猶有觀焉故曰其在後乎風行而著於土故曰其在異國乎若在異國必姜姓也姜大嶽之後也山嶽則配天物莫能兩大陳衰此其昌乎及陳之初亡也陳桓子始大於齊其後亡也成子得政

穀梁

言公子而不言大夫公子未命為大夫也其曰公子何也公子之重視大夫命以執公子

胡傳

公子之重視大夫殺而或稱君或稱國或稱人何也稱君者獨出於其君之意而大夫國人有

不與焉如晉侯殺其世子申生之類是也稱國者國君大夫與聞其事而不請於天子如鄭殺其大夫申侯之類是也稱人者有二義其一國亂無政衆人擅殺而不出於其君則稱人如陳人殺其公子御寇之類是也其一弑君之賊人人所得討背叛之臣國人之所同惡則稱人如衛人殺州吁鄭人殺良霄之類是也攷於傳之所載以觀經之所斷則罪之輕重見矣

集說

范氏甯曰大夫既命得執公子之禮一本大夫命以視公子孫氏復曰春秋之義非天子不

得專殺此言陳人殺其公子御寇者譏專殺也是故二百四十二年無天王殺大夫文書諸侯殺大夫者四十七何哉古者諸侯之大夫皆命於天子諸侯不得專命也大夫有罪則請於天子諸侯不得專殺也

大夫猶不得專殺況世子母弟乎春秋之世國無大小其卿大夫士皆專命之有罪無罪皆專殺之其無王也甚矣故孔子從而錄之以誅其惡稱君稱國稱人雖有重輕而其專殺之罪則一也

劉氏敞曰公

子非大夫也何以書公之嫡子也公之嫡子則世子也其謂之公子何嫡子既誓稱世子未誓稱公子雖未誓書也殺世子母弟目君此其曰陳人殺之何病御寇也曷為病之御寇之為人子也蓋足以殺其身已矣孫氏覺曰御寇以公子之貴而見殺於國人御寇有罪矣陳之君使公子而見殺焉亦未免乎有罪也張氏洽曰不稱世子未誓於天子也未誓則稱公子重王命也御寇乃君之嫡嗣為一國之儲貳而衆人得以殺之則其所以自處必有失其道者矣故劉氏譏御寇之為人子足以殺其身而春秋畧殺者之罪也呂氏大圭曰殺之或稱公子或稱大夫或稱大夫公子稱公子者公子而非大夫也稱大夫

者大夫而非公子也稱大夫公子者公子而為大夫也又有以官舉者以官之重而著之也觀聖人所書而褒貶寓乎其中矣邵氏寶曰御寇陳世子也何以殺之欲立嬖姬子款也殺者宣公而歸之陳人者何陳人之志猶公之志也是以與申生異辭季氏本曰此國人亂殺大夫之始事也姑息苟容不謀討治則人將效尤而下陵上替之漸長矣

夏五月

集說

何氏休曰以五月首時者譏莊公取讎國女不可以事先祖奉四時祭祀猶五月不宜以首時

杜氏預曰年之四時雖或無事必空書首月以紀時變以明歷數莊公獨稱夏五月及經有四時不具者邱明無文皆闕繆也范氏甯曰以五月首時甯所未詳楊氏士勛曰何休云譏娶讎女杜預云繆

誤范氏以二者皆無憑故云甯所未詳也孫氏復曰春秋未有以五月首時者此言夏五月者蓋五月之下有脫事爾劉氏敞曰此其以五月首時何春秋故史也有所不草高氏閔曰非五月之下脫簡則是誤以四月為五月爾卓氏爾康曰春秋無事以首時稱者五十九惟此書五月案經書夏五月諸家所見不同觀孫氏復劉氏敞之說則杜氏以為闕繆者於義為長也或者謂周之四月乃夏之二月周官以是月會男女詩曰士如歸妻迨冰未泮言其禮之宜豫則是月者昏姻之月也莊公居喪而納幣娶讎人女則昏姻之禮廢經不書四月殆以是歟故並存何氏注以俟參考

秋七月丙申及齊高傒盟于防

傒音奚

公羊

齊高傒者何貴大夫也曷為就吾微者而盟公也公則曷為不言公諱與大夫盟也

穀梁

不言公高
僖仇也

集說

趙氏匡曰凡盟不目內皆指公也 陸氏淳曰
趙氏云書高僖罪之也齊恃霸主強使卿與公

盟故特書之以示譏

劉氏敞曰杜氏曰高僖齊之

貴卿而與魯微者盟齊桓謙接諸侯以崇霸業非也

卿不可會公侯故沒公爾 程子曰高僖上卿魯無

使微者與盟之理蓋諱公盟始與讎為昏惡之大也

張氏洽曰敵大夫以自卑輕君體以自弱去國都

而汲汲於小信與及向戌盟于劉一也而此復以昏

姻而結盟不顧禰廟不共戴天之讎而議娶齊女比

事以觀此為惡之大者也 家氏鉉翁曰魯人忘君

父之大讎請昏於齊齊使高僖要魯以盟其傲魯也

甚矣春秋書之責齊也雖為魯諱亦責魯也文二年

及晉處父盟彼時公身在晉晉君不與公盟使其臣

及公盟故春秋深責晉人之無狀去處父族以示貶

此則齊魯均責焉耳蓋諱之中有權度存焉不可以一律觀也李氏廉曰公出國都而盟惟高侯向戌蓋公不敢坐盟之此正與晉悼出長檮盟公相似然晉悼與公敵體則出而盟公可以為謙魯公屈體而從大夫卑莫甚矣汪氏克寬曰防盟出公意故高侯不去氏

冬公如齊納幣

公羊

納幣不書此何以書譏何譏爾親納幣非禮也

穀梁

納幣大夫之事也禮有納采有問名有納徵有告期四者備而後娶禮也公親納幣非禮也故

之譏

胡傳

微者名姓不登於史冊高侯齊之貴大夫也曷為就吾之微者盟蓋公也其不言公諱與高侯

盟也來議結昏取讎人女大惡也娶者其為吉下主乎已上主乎宗廟以為有人之心者宜於此焉變矣公親如齊納幣則不待貶也

集說

何氏休曰納幣即納徵納徵者曰主人受幣士受儷皮是也禮言納徵春秋言納幣者春秋質

也

范氏甯曰公母喪未再朞而圖昏傳無譏文但

譏親納幣者喪昏不待貶絕而罪惡見

趙氏匡曰

昏禮有六一納采二問名三納吉四納徵納徵即納

幣也五請期六親迎親迎即逆女也春秋獨書其二

以納幣方契成逆女為事終舉重之義也啖氏助

曰納幣常事不書凡書者皆譏也劉氏敞曰譏喪

取也納徵大夫之事也親納幣亦非禮也交譏之

杜氏諤曰春秋內適外曰如苟書其事蓋非常也動

涉非禮明書之以示貶程子曰齊疑昏議故公自

行納幣後二年方逆齊難之也胡氏銓曰諸侯非

朝王述職而擅越境以納幣無王甚矣不止其喪昏娶讎也 呂氏本中曰莊公失禮者三娶讎女一也

喪未畢二也親往納幣三也 張氏洽曰莊公生至

是三十五年矣制於文姜過期而不娶今喪未畢而

納幣圖昏又忘父讎禮不當親行而躬致其禮其為

不孝之罪不待貶絕而自見矣 家氏鉉翁曰或謂

魯與齊既為會盟春秋無責通昏不亦可乎夫主夏

盟者齊桓也今請昏而納幣者齊襄之女也盟讎人

之弟猶曰為其伯也諸侯皆在不得不與於盟娶妻

豈無他族必讎女而後娶其何以奉窆盛入先君之

廟乎 王氏元杰曰春秋十二公書如齊者未嘗書

其事也於莊公凡三書之納幣觀社逆女是也 李

氏廉曰書納幣三文二年公子遂譏喪娶成八年宋

公孫壽昏禮不當使公孫也蓋昏常事不書凡書皆

譏

矣

庚惠王
成六年

二十有三年

齊桓十五年晉獻六年衛惠二十九年蔡穆四年鄭文二年曹莊三

十一年陳宣二十二年杞惠二年宋
桓十一年秦宣五年楚成王頤元年

春公至自齊

公羊

危之也

集說

楊氏士勛曰二十七年傳云桓會不致此與下文觀社皆書公至自齊者公羊傳云危之也徐

邈亦云不以禮行故致以見危范此雖無注下云公
怠棄國政此行犯禮憂危甚矣則亦以二者為憂危

致之也

劉氏敞曰公羊云公一陳陀也非也妄說

不可以通

王氏葆曰公行二十有三書至者五而

已公親往納幣既忘桓公之世讎復廢文姜之喪禮
自是而下觀社逆女皆致焉聖人之意豈不深切著

明哉 張氏洽曰書至告於廟也春秋書至蓋原於書巡狩而歸格于藝祖用特之意聖人以舉動之公往返之節質之幽明而無愧也今莊公忘父讎而娶其女冒母喪而往納幣以此告廟其心將何如哉此與他日書至不可同日語比事屬辭示人之意顯矣趙氏與權曰莊公踰年而後反居喪告朔之禮俱廢焉 李氏廉曰齊桓之編莊公與之會盟遇伐救者九皆不書至獨三如齊書至者此三事皆為娶讎女而行也僖公與之會盟七不書至兩如齊亦不至獨伐楚伐鄭壯邱于淮書至伐楚伐鄭大其功壯邱于淮忘其哀也當參公穀方通 汪氏克寬曰說公羊者以謂公如齊淫此未必然夫莊公議昏於齊至再至三盟防遇穀會扈屢為好會納幣觀社逆女屢造於齊莊公求之如是其急齊桓許之如此其緩又安肯容其縱淫於其國而不恥耶 湛氏若水曰告廟必曰今已納幣聘娶齊某女夫齊侯親殺桓公者

也世讎也桓公有知其心當何如耶莊公於是乎罪不可逭矣卓氏爾康曰魯自莊十三年盟柯始與齊桓盟會者十如齊者二而皆不書至至莊二十二年之納幣二十三年之觀社二十四年之逆女與遇穀盟扈前後錯列於經更皆書至蓋以納幣觀社逆女三行非禮故書至以見公過

祭叔來聘

穀梁其不言使何也天子之內臣也不正其外交故不與使也

胡傳祭伯來朝而不言朝祭叔來聘而不言使尹氏王子虎劉卷來討而不書其爵秩皆所以正人

臣之義也人君而明此不容下比之臣人臣而明此不為交私之計黨錮之禍息矣

集說范氏甯曰祭叔天子褒內諸侯何休曰南季宰渠伯糾家父宰周公來聘皆稱使獨於此奪之

何也鄭君釋之曰諸稱使者是奉王命其人無自來之意今祭叔不一心於王而欲外交不得王命來故去使以見之啖氏助曰私行假言聘故不言王使以譏之陸氏淳曰不言使者原其來意非天子之命爾劉氏敞曰祭者何邑也叔者何字也曷為氏邑而字天子之下大夫也下大夫爵附庸王氏葆曰祭采地叔字天子之大夫也儻不以王命來則當以祭伯來之例書儻以王命來則當以天王使凡伯來聘之例書今但曰來聘見其假王命而私交也呂氏大圭曰王臣來聘者八列國聘魯者三十一他皆言使此獨不言使或謂祭叔以私來而自以聘禮行也然祭伯來私來也言來則不當言聘聘非自來也或謂祭叔使人來聘其不稱使不與祭叔之使亦非也此與武氏子來求賻毛伯來求金一例爾蓋武氏毛伯之來非王命故皆不言使祭叔非王命而來聘故亦不言使也趙氏與權曰祭有祭公祭伯祭

叔意者叔其弟也猶蔡季許叔之類伯其爵也公其官也吳氏澂曰祭圻內之國王臣也不當外交諸侯而祭自入春秋伯之來公之來叔之來聘凡三交魯矣王臣私交之非禮或朝或聘其罪一也汪氏克寬曰春秋書使人來聘未有止稱其君而不著其臣者荆楚無君臣之辭然曰荆人來聘亦指荆之微者爾何嘗言荆子來聘哉或云祭叔乃祭公之臣或以為祭公之弟果其臣若弟而不言使則是隱私交之迹矣或云祭叔請王命而來聘苟請命於王則王命之矣舊史必書曰天王使祭叔來聘聖人何以知其擅命而削不稱使耶

案祭叔為王朝大夫假聘禮私行故不稱使此正義也杜氏預本徐氏邈之說謂祭叔為祭公來聘蘇氏亦謂祭叔為祭公之屬劉氏敞則謂祭叔自使人來聘其臣不達於春秋故不稱使皆無確據故不錄

夏公如齊觀社

左傳

二十三年夏公如齊觀社非禮也曹劌諫曰不可夫禮所以整民也故會以訓上下之則制財

用之節朝以正班爵之義帥長幼之序征伐以討其不然諸侯有王王有巡守以大習之非是君不舉矣君舉必書書而不

不法後嗣何觀

公羊

何以書譏何譏爾諸侯越竟觀社非禮也

穀梁

常事曰視非常曰觀觀無事之辭也以是為尸女也無事不出竟

胡傳

莊公將如齊觀社曹劌諫曰齊棄太公之法而觀民於社君為是舉而往觀之非故業也天子

祀上帝諸侯會之受命焉諸侯祀先公卿大夫佐之受事焉不聞諸侯之相會祀也君舉必書書而不法

後嗣
何觀

集說

何氏休曰觀社者與親納幣同義社者土地之主祭者報德也生萬物居人民德至厚功至大

故感春秋而祭之天子用三牲諸侯用羊豕杜氏預曰凡公出朝聘奔喪會葬皆但書而不言其事此

春秋之常然則喪葬常事故不書觀社非常故特書

劉氏敞曰觀社與觀魚一也觀社稱如觀魚不稱

如內外之辨也諸侯於其竟外可以言如於其竟內不可以言如程子曰昏議尚疑故公以觀社為名

再往請議後一年方逆蓋齊難之張氏洽曰社者

古人祀地之名古制惟為社事單出里惟為社田國

人畢作東遷而後王制漸變祀事不存古意寔為美

觀襄公二十四年齊社蒐軍實使客觀之其廢祀典

而夸愚俗兆於今矣家氏鉉翁曰穀梁以是行為

尸女尸之云者盛其車華其服炫惑婦人而蠱其心

要其從己是之謂無別故書以責之 吳氏澂曰社者諸侯祭其土示之常事未聞隣國之君往觀之者如齊而曰觀社此何禮哉蓋齊俗每因祭社則蒐軍以夸示威衆而聚人觀之故莊公得託此為名以如齊也 程氏端學曰諸侯非王事不出竟且諸侯各有其社舍所事而觀他國之社已非禮矣況齊為讎國又有新昏之嫌於此見莊公之棄國政無君父壞禮法忘廉恥縱遊觀罪具見矣 邵氏寶曰無故而行是之謂縱有為而往是之謂淫公於是三十有六矣意者齊人有疑於年故公夸示之者不一而足歟

附錄左傳

晉桓莊之族偏獻公患之士蒍曰去富子則羣公子可謀也已公曰爾試其事士蒍

與羣公子謀諧富子而去之

公至自齊

集說

王氏葆曰宗廟社稷諸侯所同有也其禮有常

而治民哉況公之意以觀社為名而實窺齊女其誨淫召亂必矣所以危而書至也

荆人來聘

楚交中國始此

公羊

荆何以稱人始能聘也

穀梁

善累而後進之其曰人何也舉道不待再

集說

杜氏預曰不書荆子使某來聘君臣同辭者蓋楚之始通未成其禮孔氏穎達曰楚武王熊

達始居江漢之間猶未能自同列國故稱荆敗蔡師荆人來聘從其所居之稱而總其君臣是言楚之始通未成其禮之意此云荆人來聘是臣來也僖二十一年楚人使宜申來獻捷言使則是君也而經亦書

楚人是君臣同辭 楊氏士勛曰不言楚人而云荆人者傳稱州不若國楚既新進若稱國繫人嫌其大褒故直舉州稱人言聘以進之 孫氏復曰荆十年敗蔡師于莘始見於經十四年入蔡十六年伐鄭皆曰荆此稱人者以其修禮來聘少進之也 陳氏傳良曰稱人於是始蓋進之也 隱桓之春秋舍王室若姻隣無聘魯者矣而荆人先修聘於上國進之也者憂之也 張氏洽曰楚自四五年來先加兵於蔡鄭而聘使至魯用遠交近攻之術聖人於此書其來聘而不書使必其禮有未備者中庸曰送往迎來嘉善而矜不能三代柔遠人之道也此時以魯而受楚之聘亦當審所以待之之術矣 家氏鉉翁曰書荆書楚書楚人書楚子每書輒異者著其漸盛也 李氏廉曰荆之聘魯三始書荆人繼書楚子使椒又繼書楚子使蘧罷蓋進之以漸也其進之之義三傳皆同然荆聘魯而旋有伐鄭之師介朝魯而繼有侵蕭之

役秦人歸棧來聘而意在河曲之戰其窺覘之謀離
間之術常如此故陳氏張氏之說皆得之汪氏克
寬曰公穀皆謂稱人所以進之或謂春秋著其漸盛
今考楚之交中國始書荆人繼書楚屈完然後書楚
子使椒楚子使遠罷蓋始而來聘則嘉其慕義而稱
人既而來盟予其服義則進而稱名氏及其浸慕中
國則稱君稱臣矣吳之始見也亦祇舉號及其來會
諸侯則進而稱人使季札聘則嘉其慕義而稱君稱
臣雖曰進之而吳楚漸盛之勢已見於言意之表矣
然楚之初聘止曰荆人而不著君臣雖曰進之而實
則畧之也蓋不可言荆來聘故謂之荆人特比於舉
號則為進之耳陳氏際泰曰荆禍先中於蔡荆聘
先通於魯

公及齊侯遇于穀

穀梁

及者內為志焉爾
遇者志相得也

集說

張氏洽曰為昏姻而齊難之也不可與為昏姻
則當絕之而數與之約然後與之書此所以著

莊公之不子而齊桓待人之不以義也黃氏震曰
遇者禮之簡公亦自知數會之煩擾而簡其禮也
家氏鉉翁曰魯莊之為此遇繼納幣觀社而
書著其急於得耦而求之惟恐其未至也

蕭叔朝公

公羊

其言朝公何
公在外也

穀梁

微國之君未爵命者其不言來於
外也朝於廟正也於外非正也

胡傳

穀齊地蕭叔附庸之君也為禮必當其物與其
所而後可以言禮大夫宗婦覲而用幣則非其

物也蕭叔朝公在齊之穀則非其所也嘉禮不野合而朝公於外是委之於野矣故禮非其所君子有不

受必反之於正而後止此亦春秋撥亂之意也

集說

何氏休曰言朝公惡公不受於廟徐氏彥曰隱七年注云不言聘公者禮聘受之於大廟孝

子謙不敢以己當之歸美於先君且重賓也隱十一年注云不言朝公者禮朝受之於大廟與聘同義今

此言公故如此解

啖氏助曰人君相見曰朝皆受之於廟以重禮也劉氏敞曰蕭叔朝公杜云叔者

蕭君名非也邾蕭同是附庸邾與魯盟得褒稱字蕭來朝公猶不免名何哉凡春秋褒貶自有輕重聖人所以教後世賞罰也若盟而蒙加等之賞朝而無勞來之意則賞罰已亂於春秋何能教人高氏閌曰公納幣而還則祭叔聘之觀社而還則荆人聘之遇穀則蕭叔朝之此其志所以自得而不復忌憚也

張氏洽曰書朝公以見非其地蕭之來魯之受皆非禮也李氏廉曰蕭叔左氏穀梁皆以為名胡氏以入中國附庸稱字之例正義曰蕭本宋邑宋桓公立蕭叔大心有功焉宋人封以為附庸又曰蕭叔之朝公與僖公之朝王所其非地一也彼言所而此不言所者王者以天下為家無適而非所也汪氏克寬曰齊莊公弔杞梁之妻於郊辭曰君之臣不免於罪則將肆諸市朝而妻妾執若免於罪則有先人之敝廬在下妾不得與郊弔齊侯弔諸其室使魯莊能如梁妻之知禮而辭蕭叔之朝則為不悖於禮矣今莊公誅於私欲而受非禮之禮故聖人特書曰朝公而不曰來朝所以交貶之也

秋丹桓宮楹

左傳

秋丹桓宮之楹

公羊

何以書譏何譏爾
丹桓宮楹非禮也

穀梁

禮天子諸侯黜堊大夫
倉士黜丹楹非禮也

集說

何氏休曰楹柱也丹之者為將娶齊女欲以夸
大示之高氏閔曰莊公不能為桓復讎而反

娶其女以奉祭祀故丹楹刻桷以示孝甚矣莊公之
行詐也夫宗廟之飾國有彝典而妄肆奢麗加於禩
宮亂王制瀆先君不恭莫大
焉聖人直書其事具文見意

案穀梁謂天子諸侯黜堊諸家之說以黜為黑柱堊
為白壁者徐氏邈也以黜堊為黑色者范氏甯楊氏
士勛也以為天子黜諸侯堊者劉氏敞也說文訓堊
為白涂爾雅牆謂之堊郭璞曰以白土飾牆也山海
經白堊黑青黃堊注言雜色堊也則非白土之謂矣
考周禮注云素車以白土堊藻車以蒼土堊釋名云

聖者亞之也次也先泥之次以灰飾之也是聖字貫下二句猶云天子諸侯黜聖大夫蒼聖士黠聖焉爾

冬十有一月曹伯射姑卒

十有二月甲寅公會齊侯盟于扈

扈音戶 扈杜注鄭地在蒙陽卷縣西北

後漢志卷縣有扈城亭今河南開封府原武縣扈亭西北是也

胡傳

程子曰遇于穀盟于扈皆為要結姻好也傳稱男子二十而冠冠而列丈夫三十而不娶則非

禮矣然天子諸侯十五而冠者以娶必先冠而國不可久無儲貳欲人君早有繼體也今莊公生於桓公之六年至是三十有六載矣以世嫡之正諸侯之貴尚無內主同任社稷之事何也蓋為文姜所制使必娶於母家而齊女待年未及故莊公越禮不顧如此其急齊人有疑如此其緩而遇于穀盟于扈要結之

也娶夫人奉祭祀為宗廟之主而母言是聽不以大義裁之至於失時不孝甚矣春秋詳書於策為後戒也

集說

孫氏復曰公會齊侯盟于扈謀逆姜氏也公二

又會盟于扈甚矣

劉氏敞曰公羊曰危之也妄說

爾

王氏葆曰越禮要盟遠至鄭地而不恥者促昏

期也

張氏洽曰至此又盟以結其信而後許之也

吳氏澂曰遇穀以請而齊猶難之故盟以要其信

而後許也夫求昏者可求則求不可則已許昏者可

許則許不可則卻魯欲求齊昏不以媒灼往覘其可

不可公乃自與齊高傒盟以求之未得齊諾而公遽


親納幣是與彊委禽者同也躬納幣而猶未諾則又

往觀社以請觀社以請而猶未諾則又遇于穀以請

遇穀之後宜若可矣又必盟于扈而後可焉何其難

之之甚也二國之昏姻不以禮不以義如此哀姜之不終也宜哉汪氏克寬曰諸傳皆謂莊公受制於母俾娶讎女今考莊公以文姜葬後求昏於齊自盟防而會遇者三自納幣而如齊者三汲汲奔走不憚煩勞而且盛飾禰宮以夸示其配使莊公果以文姜遺命而娶齊女亦縱欲而不能自克爾非迫於義而不敢違也

欽定春秋傳說彙纂卷九



覆校官檢討臣李學錦

校對官檢討臣陳夢元

謄錄監生臣俞燠